



Datë: 10.10.2025
Numër Protokolli: 6722/2025

A.nr.1689/2025

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga Ardita Haxhnikaj-Demi, kryetare, Malsore Gashi-Bajraktari dhe Eshref Shabani, anëtarë, më Kaltrina Avdullahi Prenaj, në cilësinë e procesmbajtëses, në procedurës sipas ankesës me numër A.nr.1689/2025, të datës 12.09.2025, të parashtruar nga ankuesi A.K, të cilin sipas autorizimit e përfaqëson Avokst Nuhi Krasniqi nga Malisheva, kundër organit të punësimit: Komuna e Malishevës, në çështjen juridike-administratave, “shkelje e të drejtës në pagë”, duke vepruar në pajtim me nenin 6, paragrafin 1, nën paragrafin 1.1, nenin 16, paragrafi 3 dhe nenin 18, paragrafin 1, nën paragrafin 1.4 dhe 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, me datë 10.10.2025, mori këtë:

V E N D I M

I.Hedhet poshtë si e parakohshme ankesa me numër A.nr.1689/2025, e datës 12.09.2025, e parashtruar nga ankuesi A.K.

II.Obligohet Kryetari i Komunës së Malishevës që të ndërmerr të gjitha veprimet e nevojshëm ligjore-administrative në mënyrë që në afat sa me të arsyeshëm kohor të përfundohet procesi për miratimin e rregullores për sistematizimin vendeve të punës për nëpunësit civilë në këtë institucion, që të gjitha veprime këto të iniciohen brenda fatit prej 15 ditësh nga dita e pranimi të këtij vendimi.

A r s y e t i m

Nëpunësi civil A.K(në tekstin e mëtejme referuar: Ankuesi), më datë 12.09.2025, përmes përfaqësuesit të autorizuar Av.Nuhi Krasniqi, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, për shkak të mos kategorizimit të pozitës së saj si Zyrtar për Shërbime me Qytetarë sipas Vendimit Nr.08/226 të datës 23.10.2024, të miratuar nga Qeveria e Republikës së Kosovës.

Këshilli i Pavarur Mbikëqyrës për Shërbimin Civil të Kosovës (në tekstin e mëtejme referuar: Këshilli) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, më datë 18.09.2025 ka proceduar kërkesën për përgjigje në ankesë tek Komuna e Malishevës, ndërsa, kjo e fundit, më 29.09.2025, ka dhënë përgjigje në pretendimet ankimore, duke përcjell edhe provat materiale lidhur me çështjen ankimore.

Kolegji për Shqyrtimin dhe Vendosjen e Ankesave, për shqyrtimin e kësaj lënde ka administruar këto prova: Ankesën me numër protokoli 6125/2025, të datës 12.09.2025 të parashtruar nga ankuesi përmes përfaqësuesit të autorizuar Av.Nuhi Krasniqi në Këshillin e Pavarur Mbikëqyrës për Shërbimin Civil të Kosovës; Kopjen e pasaportës; Autorizimin e datës 12.09.2025; Akt emërimit Nr.01/07/2024 të datës 01.07.2025; Akt emërimit Nr.01/673 të datës 09.06.2025; Konkursin e datës 21.02.2025; Kërkesën e datës 30.06.2025; Kërkesën e datës 01.08.2025; Vendimin Nr.08/226 të datës 23.10.2024; Formularin e parashtrimit të ankesës; Kërkesën për përgjigje në ankesë të datës 18.09.2025; Përgjigjen në ankesë të datës 29.09.2025 së bashku me sqarimet dhe dokumentet e bashkangjitura; Listën e pagave; Përgaditjen profesionale të ankuesit: Diplomën Nr.3442, të datës 25.07.2025 të lëshuar nga Universiteti i Prishtinës Hasan Prishtina.

Kolegji i Këshillit nga analizimi i shkresave të lëndës si dhe referuar pretendimeve ankimore të parashtruara nga ankuesi, ka gjetur se ankesa është e parakohshme, sepse:

Bazuar në shkresat e lëndës rrjedhë se ankuesi është i punësuar në Komunën e Malishevës dhe se i njejti ushtron pozitën e punës Zyrtar Administrativ, në Drejtorinë për Administratë të Përgjithshme, ankuesi është kategorizuar në kategorinë Profesional 3, me koeficient të pagës 3.94.

Më datë 01.08.2025, ankuesi i është drejtuar organit të punësimit me kërkesë për ndryshimin e Aktit të emërimit, përkatësisht koeficientit të pagës nga klasa Profesional 3 në klasën Profesional 2, ndërsa, kjo e fundit nuk ka dhënë përgjigje në raport me kërkesën e parashtruar nga ankuesi.

Ankuesi si rezultat i heshtjes administrative nga organi i punësimit ka parashtruar ankesë në Këshillin e Pavarur Mbikëqyrës për Shërbimin Civil të Kosovës, mbi pretendimin ankimor se institucioni punëdhënës nuk ka zbatuar Vendimin Nr.08/226 të Qeverisë së Republikës së Kosovës të datës 23.10.2024 . Shton së pozita e tij duhet të kategorizohet nga klasa profesional 3 në klasën profesional 2. Kërkon nga Këshilli që të aprovoj ankesën dhe të detyroj organin përkatës të punësimit, respektivisht Komunën e Malishevës që të bëj ndryshim-plotësimin e akt emërimit, ashtu që pozita e tij të klasifikohet sipas klasës profesional 2, të paraparë me Katalogun e Vendeve të Punës, si dhe të bëj kompensimin e diferencës në mënyrë retroaktive nga data 23.10.2025, nga data e hyrjes në fuqi e katalogut.

Lidhur me shqyrtimin e pretendimeve ankimore të ankueses, Kolegji i Këshillit analizoi dispozitat e Ligjit Nr. 08/L-196 për Pagat në Sektorin Publik, me theks të veçantë nenin 2 paragrafi 1 dhe 2 si dhe nenin 14 paragrafi 3 ku parashihet se: ” Neni 2: 1. Ky ligj zbatohet për të punësuarat/it në sektorin publik pagat e të cilave/ëve financohen nga dhe përmes buxhetit të shtetit, 2. Rregullat dhe kushtet për përcaktimin e pagës të punësuarave/ëve në sektorin publik janë ekskluzivisht rregullim i këtij ligji dhe mund të rregullohen edhe me akte të tjera nënligjore, vetëm kur parashihet shprehimisht nga ky ligj”, Neni 14: 3. Klasifikimi i një pozite të caktuar të shërbimit civil, bëhet në bazë të rregullave të vlerësimit dhe klasifikimit të pozitave të punës, sipas dispozitave për klasifikimin e pozitave të shërbimit civil, në pajtim me legjislacionin në fuqi për zyrtarët publik...” referuar këtij përcaktimi ligjor, Kolegji i Këshillit konstatoi se paga bazë e nëpunësit civil përcaktohet sipas klasës së pagës, përkatësisht koeficientit, të cilit i përket pozita e punës, e klasifikuar në shtojcën Nr.10 të Ligjit Nr.08/L-196 për Pagat në Sektorin Publik, ndërsa, klasifikimi i një pozite të caktuar të shërbimit civil, bëhet në pajtim me legjislacionin në fuqi për zyrtarët publik dhe rregulloren e aplikueshme për klasifikimin e vendeve të punës në Shërbimin Civil.

Ne fakt, Kolegji i Këshillit nga shqyrtimi i provave të lëndës ka gjetur se organi i punësimit, gjegjësisht Komuna e Malishevës deri në parashtrimin e ankesës nga ana e ankueses nuk ka të përfunduar procesin e klasifikimit të vendeve të punës për nëpunësit civil në kuadër të këtij institucioni, mirëpo, në përgjigjen në ankesë të datës 29.09.2025 del se Komuna e Malishevës ka ndërmarr veprime në kuptim të nxjerrjes së Rregullores për organizim të brendshëm dhe klasifikim të vendeve të punës në këtë institucion, gjegjësisht, e njehta ka njoftuar Këshillin se është në fund të finalizimit të Rregullores së brendshme për klasifikimin e vendeve të punës dhe në bazë të Katallogut të vendeve të punës. Andaj, mbi këtë rrethanë faktike, konkretisht duke qenë se organi përkatës i punësimit është në fazën e përgatitjes së rregullores për organizim të brendshëm dhe klasifikim të pozitave të punës për nëpunësit e saj publikë, akt nënligjor që bartë edhe obligime tjera buxhetore, atëherë, Kolegji i Këshillit vlerëson se ankesa e parashtruar nga ankuesi për klasifikimin e pozitës së tij sipas kategorisë profesionale 2, është e parakohshme, dhe si e tillë, në këtë fazë nuk i plotëson kushtet ligjore për trajtim meritore.

Në kuptim të parimit të ligjshmërisë dhe pritshmërisë legjitime si parime bazë në punën e institucioneve publike, Kolegji i Këshillit rikujton organin punëdhënës në këtë rast Komunën e Pejës që bazuar në nenin 34 të Rregullores (QRK) Nr.06/2024 për Klasifikimin e Vendeve të Punës në Shërbimin Civil, e aplikueshme nga data 28.02.2024, si dhe në mbështetje të Vendimit Nr.08/226, të datës 23.10.2024, të Qeverisë së Republikës së Kosovës për miratimin e Katalogut të Vendeve të Punës për Shërbimin Civil, ka qenë e obliguar që të përfundojë klasifikimin e vendeve të punës në përputhje me Rregulloren Nr. 06/2024 për Klasifikimin e Vendeve të Punës dhe këtë katalog. Andaj, çdo shmangie nga ky detyrim ligjor përbën mos veprim të organit publik dhe njëkohësisht bartë pasoja materiale për zyrtaret publikë në kuptime të klasifikimit të pozitës dhe pagës së tyre, kështu që, Komuna e Malishevës duhet të përfundojë sa më shpejt rregulloren për organizim të brendshëm dhe sistematizimin e vendeve të punës, në atë mënyrë që nëpunësitë të realizojnë pagën në pajtim me legjislacionin aplikueshëm për pagat në sektorin publik.

Thënë si më lartë, e në mbështetje të nenit 18, paragrafi 1, nën paragrafi 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi si në dispozitiv të këtij vendimi.

Këshillë juridike: Vendimi hyn në fuqi në ditën e nënshkrimit nga Kryetarja e Kolegjit. Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë—Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalin ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.1689/2025

Kaltrina Avdullahi Prenaj

Ardita Haxhnikaj - Demi

Procesmbajtëse

Kryetare e Kolegjit

Vendimi i dërgohet:

- Përfaqësuesit të autorizuar të ankuesit, Avokat Nuhi Krasniqi;
- Udhëheqësit të Burimeve Njerëzore në Komunën e Malishevës; dhe
- Arkivit të KPMSHCK-së